



ERINDISBRÉF

Jafnréttisnefndar Skaftárhrepps

Stjórnskipuleg staða

Jafnréttisnefnd Skaftárhrepps heyrir undir sveitarstjórn Skaftárhrepps.

Skipan, seturéttur á fundum og áheyrnaraðild

Í nefndinni eiga sæti þrír fulltrúar kosnir af sveitarstjórn að afloknum sveitarstjórnarkosningum skv. ákvæðum *sveitarstjórnarlaga nr. 138/2011*. Sveitarstjórn kýs nefndinni formann og hverjum aðalmanni er jafnframt kosinn varamaður. Hafi tveir eða fleiri flokkar eða framboðslistar haft samstarf um kosningu umhverfisnefndar, skal sá sem tilnefndi viðkomandi nefndarmann einnig tilnefna varamann hans. Nefndin kýs sér varaformann og ritara úr hópi nefndarmanna.

Kjörtímabil Jafnréttisnefndar er hið sama og sveitarstjórnar. Auk kjörinna fulltrúa á sveitarstjóri Skaftárhrepps rétt til fundarsetu með málfrelsi og tillögurétti. Þá er heimilt að kalla til á fundi nefndarinnar sérhvern þann er tengist málum sem fjallað er um hverju sinni. Starfsmönnum stofnana sveitarfélagsins er skylt að sitja fundi jafnréttisnefndar sé þess óskað.

Hlutverk og verksvið

Hlutverk jafnréttisnefndar er stefnumótun, stjórn og samræming á jafnréttismálum sveitarfélagsins. Meðal verkefna nefndarinnar er:

- ◆ umsjón með gerð [jafnréttisáætlunar](#) fyrir sveitarstjórnina til fjögurra ára en hana á að leggja fram ekki síðar en ári eftir kosningar.
- ◆ að gera tillögur að fjárhagsáætlun til sveitarstjórnar um útgjaldaliði jafnréttismála.
- ◆ að fylgjast með framkvæmd jafnréttislaga og annarra laga og reglugerða er snerta starfssvið nefndarinnar.
- ◆ að sjá um önnur þau verkefni sem sveitarstjórn felur henni á sviði jafnréttismála

Starfshættir

Um starfshætti undirnefnda sveitarstjórnar Skaftárhrepps er fjallað í IV. kafla í *samþykkt um stjórn og fundarsköp sveitarfélagsins Skaftárhrepps* og skal ákvæðum kaflans fylgt eftir því sem við á.

Jafnréttisnefnd fundar að minnsta kosti þrisvar á ári. Nefndarformaður stýrir fundum nefndarinnar og sér um að taka á móti erindum og málum sem leggja á fyrir nefndina. Fundarboð skal sent öllum aðalmönnum (varamönnum í forföllum aðalmanna) og öðrum sem seturétt eiga á fundum jafnréttisnefndar. Boðun funda skal fara fram með tryggilegum hætti svo öruggt sé að fundarboð hafi borist öllum í síðasta lagi sólarhring fyrir fund. Færa skal fundargerð hvers fundar og er formaður ábyrgur fyrir að hún sé lesin upp í lok fundar og staðfest af viðstöddum fundarmönnum. Í fundargerð skal koma fram númer fundar, skv. talningu ákveðinni af sveitarstjórn, hvar og hvenær fundur er haldinn og hverjir sitji hann. Skrá skal mál sem tekin eru fyrir. Lýsa skal erindum með meginefni þeirra, aðilum og dagsetningum bréfa.

Jafnréttisnefnd afgreiðir mál með samþykktum, ályktunum og ákvörðunum. Sé mál ekki afgreitt samhljóða, skal greina í fundargerð hvernig atkvæði hafa skipst.

Fundargerð má hvort heldur sem er færa í gerðarbók eða beint í tölvu, en sérstaklega skal gætt ákvæða í *samþykkt um stjórn og fundarsköp sveitarfélagsins Skaftárhrepps*. Í lok fundar skal lesa fundargerðina upp og allir viðstaddir undirrita hana í gerðarbók og á útprentun tölvufærðrar fundargerðar ef því er að skipta. Sveitarstjóri sér um að undirrituð fundargerð sé tekin á dagskrá næsta fundar sveitarstjórnar Skaftárhrepps.

Nefndarmenn skulu fá hæfilega þóknun úr sveitarsjóði fyrir störf sín samkvæmt nánari ákvörðun sveitarstjórnar.

Eftirfylgni

Jafnréttisnefnd og sveitarstjóri hafa með höndum framkvæmd þeirrar stefnu sem mótuð hefur verið á hverjum tíma varðandi jafna stöðu karla og kvenna í sveitarfélaginu. Formaður og aðrir fulltrúar í jafnréttisnefnd skulu snúa sér til sveitarstjóra til að fylgja eftir þeim ákvörðunum og samþykktum sem ekki eru alfarið á verksviði jafnréttisnefndar að framfylgja.

Réttindi og skyldur jafnréttisnefndarmanna

Um réttindi og skyldur jafnréttisnefndar gilda ákvæði *sveitarstjórnarlaga* og *samþykktar um stjórn og fundarsköp sveitarfélagsins Skaftárhrepps* eftir atvikum.

Nefndarmanni er bæði rétt og skylt að sækja fundi nema lögmæt forföll hamli. Nú forfallast aðalmaður um stundarsakir og skal hann þá boða tilnefndan varamann sinn og láta formann vita um forföllin með góðum fyrirvara. Flytjist aðalmaður burt úr sveitarfélaginu, falli hann frá eða forfallist varanlega á annan hátt, tekur tilnefndur varamaður sæti hans þar til aðalmaður er kosinn að nýju og eftir atvikum annar varamaður.

Hver nefndarmaður á rétt á að koma máli á dagskrá fundar, enda skili hann efni þess til formanns nefndarinnar a.m.k. sólarhring fyrir fund. Nefndarmenn skulu hafa hag sveitarfélagsins að leiðarljósi við störf sín, en eru ekki bundnir af öðru en sannfæringu sinni og lögum í atkvæðagreiðslu um málefni á vettvangi jafnréttisnefndar. Þá skulu þeir virða í hvívetna *samþykkt um stjórn og fundarsköp sveitarfélagsins Skaftárhrepps*.

Nefndarmenn, starfsmaður nefndarinnar og aðrir sem fundi jafnréttisnefndar sitja eru bundnir þagnarskyldu um það sem þeir fá vitneskju um á fundum eða í öðru starfi sínu og ætla má að leynt eigi að fara samkvæmt eðli máls, lögum eða samþykkt 2/3 nefndarmanna, hvort sem þau varða einka- eða almannahagsmuni.

Nefndarmaður skal víkja af fundi við umræður og atkvæðagreiðslu mála sem varða hann sjálfan, skyldmenni hans eða nánustu venslamenn svo mjög að ætla má að það móti viljaafstöðu hans að einhverju leyti. Nefndarmanni er skylt að vekja athygli á því ef hæfi hans til meðferðar máls orkar tvímælis.

Lög og reglugerðir

Í störfum sínum skal náttúruverndarnefnd taka mið af þeim lögum og reglugerðum sem snerta starfssvið hennar, sérstaklega þó *lögum um jafna stöðu og jafnan rétt kvenna og karla nr. 10/2008* Þá skal nefndin fylgja *samþykkt um stjórn og fundarsköp sveitarfélagsins Skaftárhrepps* eins og hún er hverju sinni.